



Minggu, 20 Oktober 2024

Ogen : **Markus 15:40-41**



Ngikut Jesus



Ise nge si ermediate ngidah kiniseran Jesus, ibaba ku uruk Golgota, itokohi, iciduri, ipekpeki alu cambuk si erduri, ipakuken seh mate i kayu persilang? Ajar-ajar Jesus si dilaki, la teridah i bas proses penyaliben e. Salome ras teman-temanna, idauh-dauh nari natap kejadiin e. La itadingkenna Jesus tupung ndalani kiniseran. Ermediate kal ia nandangi kai si inanami Jesus, tempa-tempa ikut ia nggejapken kai si inanami Jesus e. La ia mbiar ngalaken kiniseran si banci saja seh man bana. Sabap pemerintahen Romawi paksa si e la erngena ate nandangi Jesus ras kerina si ngikjutken IA. Lanai iukuri Salome ras temanna kerna si e. I bas ia hadir nemani Jesus tupung ngalaken perbeben, banci saja nguraki kelatihen Jesus, bage me penggejapenna.

Biasana diberu niakap kalak Jahudi masyarakat kelas dua, si la meteh kai pe ras labo meherga, tapi itampilken Markus kalak e si ermediate nandangi kiniseran si inanami Jesus. Kalak si meteruk, kalak si la ikira tapi meteh mehuli. Salome ras teman-temanna ngikutken Jesus labo tupung bas meriah saja, entah tupung untung man bana tapi i bas kiniseran pe tetap ngikutken Jesus. Tangkas man kalak enda maka i bas Jesus lit kegeluhen. Payo, i bas ngikutken Jesus e lit nge perbeben ras lit nge si man galaren. Arus nge mersan kayu persilang bali ras Jesus. Resiko ngikutken Jesus e, nembah ate jelma si enterem adi kita ngeluh bujur, enterem imbang si atena nuhsahi kita. La kita nggit korupsi entah nogok, e pe jadi pandangan. Saja, kai pe si jadi, ula mobah ukur guna ngikutken Jesus e, sabap i bas IA ngenca lit kegeluhen si tuhu-tuhu e.